

四庫全書

集部

欽定四庫全書

海岱會集卷四

五言古詩

過邯鄲訪盧生夢處

劉澄甫

閱世若談夢全形如繫風蕉麻互得失柯蟻僭王封
高人喜曠達志士推豪雄伏讀枕中記隱顯頃刻終
狂歌天姥吟出入烟霞重偶行邯鄲道下馬尋遺蹤
棟宇半漫漶草樹搖舊蔥盧生睡未醒呂翁何可逢
路隅沾濁

醪一醉遊洪濛軒轅樂華胥文王徵非熊蒙叟竟為蝶
丁固乃生松轉覺夢中夢寧知空外空徘徊弗能去悵
望西山峯

前題

楊應奎

邯山紆嵒巖叢臺夾疎柳茅店古城邊荒堞帶虛牖昔
聞黃梁館寂寞千載後盧生風火腸一枕遽回首世緣
本幻寐浮生漫奔走不見平原客馳躍誰能久至人未
易逢賴茲傳不朽土人有深意建祠當道右遺像瞻清

虛悵然厭紛糾感慨夢中人無聊對尊酒

聽海山談三山

馮裕

我行倦扳登華樓卧明月時有綠髮翁相期採薇蕨顧
我發微哂清風振林樾坐談三神山海上留真窟蓬萊
高嵯峨方壺燦銀闕瀛洲何茫茫弱水渺難越聞言動
深省自審非仙骨俯爾學清虛澹然忘干謁天鷄聞扶
桑興至欲乘筏倘逢安期生因之泛溟渤客去不成寐
悵望待明發

石門

石存禮

杖屨從所適愛此石門行川原斂飛兩佳木當春榮興
言磐石間坐看雲氣生徘徊日將夕山水有餘清

前題

馮裕

初夏遊石門杖藜緣蘿徑遙遙見招提卓午殿中磬峭
壁挿半天流泉滿清聽斜陽下西淵山中倏已暝月出
照崖松狂歌谷相應老僧無一言但採松花贈

又

亭亭石門山陰陰蔽丘壑泉流高下洞壁倚虛危閣喬
松翠重疊野花委紅萼日午嵐氣開夕陽佳景薄鐘磬
杳梵宇車馬遠城郭若許幽人棲不負老僧諾樹杪坐
青雲尊前招白鶴石床到即眠甕牖無待鑿月出神愈
清山空心亦濶谷口懷子真歸與甘淡薄

前題

黃卿

石門闢如懸望望數石磴雨度風日淑簾轉薜蘿徑夾
嶺對蒼蔚後嶂如倚凭峻極碍晴旭生雲或隱暝盤據

古蘭若林樾聞鐘磬方龕無斧鑿一竅瀉溝瑩削壁饒
松栢層層互樛穿散步賞未足留憇待僧定灑灑波浮
月林光掩飛映何當呼良繪摸擬恐未稱履幽輕華靡
得奇等寤醒予自耽遁棲同遊多逸興臨發促深巖磐
石紛留詠

浴蠶

楊應奎

謀生有常理畊桑衣食源豈能靜無事而乃卧高軒新
春整舊貫農事已堪敦條桑滿絲阡歸室蠶正繁浴罷

紛成箔露葉碎供殮苦心探涼燠庶得慰朝昏閒下茅
簷下對花且開尊但願絲穀登辛勤何足言

古意

馮裕

鯤魚化為鵬搏蕩九萬里朝刷北海湄暮宿南溟涘世
局未能容道大不可毀回頭笑斥鷃寧與爾輩比嗟我
孔與孟所如曷多訾臨流或問津出晝但隱几安常而
保身若時以為理悠悠千載間出處有遺軌

前題

劉澄甫

穆滿馭八駿瑤池宴萬里神禹坐卑宮光陰惜分晷奢
儉肇興亡由來多伏倚鎬京天子遊細柳將軍壘寒暑
困征役日夜苦瘡痍居者憶翠華國士讓黃綺懸思千
載前聖賢道或否龍逢何剖心屈原竟投水堯舜倘在
上巢由甘洗耳感遇卧幽壑嘆息吾老矣

靈巖寺仙刻

黃卿

岱陰標名勝古剎開秘蹟聞昔巨鶴棲岩洞有題刻孤
亭覽峯巒伊誰移斯壁蜿蜒紫姑書復似倉頡畫壯士

擲戈劍鷲隼舒羽翼烟藤維喬柯寒崖蟄虺蜴僧言毛
中書留宿臨茲石人間自好奇紛紛遠登陟青山須呵
護風雨恐滅跡

懷管寧

楊應奎

幼安青雲士非時效泥蟠同志乃定交割席凜冰寒倏
然遠汙濁逾海障狂瀾千載仰斯人逸駕不可攀

殘菊

劉澄甫

九日節序佳白雁來賓候十月霜氣濃黃菊離披瘦落

英真可餐殘枝為誰秀采采未盈把蕭蕭豈堪嗅漠漠
鳥下巢藹藹雲入岫虛對南山松恐負東籬叟白衣不
見至空庭徒搔首

前題

陳經

離離黃金花珊珊碧玉蘭秋風花正開秋霜花始殘餘
香竟不滅落英亦可餐服以延修齡佩以比幽蘭至性
含純和嚴凝何足嘆願言崇愛護從今保歲寒

適意

徒歌逍遙曲散步舊田廬仕宦如倦旅風波浩歸歟農
夫樂歲稔園人滋新蔬花竹滿幽徑鷄鴨啄前除山茗
及春採黍酒連甕儲三川聚巨賈京市鳴笙竽南有下
灘船北有下坂輿鵬鳶在霄漢鶉雀止搶榆隣有炙背
叟卑論乃起予委懷茲咫尺宿願詎無餘

又

人生貴適意所樂在閒居春雨但種藥秋江時釣魚同
社南山老明牕讀道書萬鍾不足慕一飽願無餘門有

鳥雀羅巷無卿相車白茅覆破屋黃葉摘新蔬陶潛醉
兀兀莊周夢蘧蘧曾識無何有條然返太初

又

高陵變深谷桑田生白波千年河一清百歲能幾何顏
顏不再顏鬢髮忽以皤人生貴適意富貴安足多詩酒
聊自娛親友日相過我歌聲金石我舞形婆娑至樂在
性情非必綺與羅長安多豪俠甲第鬱嵯峨南隣吹笙
竽北里鳴絃歌卜夜以繼晝流連若懸河猶云日不足

春風顏未酖嗟嗟乾沒輩遲暮空蹉跎

杜古狂伊尹耕莘圖

陳經

阿衡誰物色偃耒耜耕有莘天命一代佐龍德寧久淪朝
為南畝叟暮作元勲臣昔當秉耒時豈殊山野民一朝
應聘出四海咸更新乾坤一開闢率土絕荆榛君民為
堯舜風俗還樸淳茫茫宇宙間躬耕豈乏人雷雲空現
奇胼胝徒苦辛不然千萬祀胡為寫其真

又

時盛巖穴空俊乂集京國國門有散人長懷咸一德不
盡伐商圖獨貌莘野蹟耒耜古制殊幘服今未識優游
獨樂容左右墳典策畎畝有餘資桀湯孰休戚商廷亟
聘徵吾道豈終寂滄海有靈隱雷起播膏澤寄言今薦
賢慎勿按圖索

孟嘗君淘米澗

陳經

廣固城西隅遙見孟嘗居云有淘米澗養士三千餘周
東世板蕩舊都成丘墟所養刀劍客強卑雜屠沽鳳凰

飽琅玕鷄豚甘蛆蛆天馬厭龍芻芻棧非所圖西伯善
養老鷹揚奮海區醴酒楚不設穆生歸田廬聖賢貴大
節君子不虛拘所以田公子徒釣養士譽徘徊古澗間
日暮空踟躕

天津觀潮

天津一巨壑渤澥通滄溟北跨青丘小東接丹穴平尾
閭泄不虛萬川歸不盈四極杳無際滉漾浮太清天吳
無恬波朝夕揚浮淘潮來雪山立潮迴奔雷轟乘桴尼

父嗟望洋莊叟情一顧壯心魄瞬息悲吾生願言羿弓
射安流無怒驚甘淵浴白日扶木撐青冥適觀干戈輯
無復東南傾

送黃海亭適江右

馮裕

東方有高士結亭在海野優游二十年所志惟大雅翻
然謁帝庭上策擬董賈宦跡遍四方琴書隨匹馬忽賦
歸去來洋溪結詩社風月共謳吟時時飛玉壘謝安棲
東山清朝誰肯舍西江紫薇堂好雨當春灑我贈海亭

行束素應傾寫滄海足大觀還當歸善下

放言

南華有真人大隱濠梁邊虛襟涵八荒白眼望青天粃糠擬堯舜瞬息齊殤錢秋水到北海河伯不敢前紛紛百家語爭似逍遙篇稽首拜下風悠悠千萬年

送陳東渚北上

皎皎東渚翁立朝三十載蓼莪起秋風歸來棲北海一從援琴後野叟日相待遨遊溜渙濱白蘋共采采珠林

結詩社雲烟慚對壘女蘿附蒼松南山何磊磊春花與
秋月對酒殊樂愷虞廷咨夔龍徵書貶光彩四牡發齊
郊我心怒如餒別筵倒清樽芹羹間魚醢郵亭薰風長
葵花正蓓蕾願言傾此心皓首以不改

夏日山中訪隱士

石存禮

治世有隱淪幽居出塵境逍遙塵外心駘蕩山中景時
豐官稅輸野曠人迹屏雨晴農事餘禾苗綠成頃俯仰
堪輿間安閒乃天幸曉來門尚闕烏啼夢初醒客至啟

南軒坐消白晝永遺編共討論微言發深省高林暑氣
無清風襲衣冷盤桓興未闌夕陽下西嶺

秋意

草蟲堦下鳴聽久猶未歇掩卷坐沈寥秋聲振林樾人
生無幾何為樂不可輟風吹浮雲開送我半牕月逍遙
步前庭孤螢自明滅



海岱會集卷四

欽定四庫全書

海岱會集卷五

七言古詩

觀獵

黃卿

長風吹林原野濶淺雪出草晴漠漠
猛山射手紛較獵
雙弧飛鞚攜繒繳老鷹半空躍
翩翩健犬起立復蹲縮
狐駭兔蹶澤雉藏四馳斜路穿叢谷
兒童狂呼滿山阿
白髮舊將偶相過須臾漉血積
獲多文皮錦翼細馬馱



五陵俠少膽氣簾邯鄲駟駿騁通衢我言驍健須壯圖
何不往射虎與驅瑣瑣肉食焉有無

文丞相祠

馮裕

文公昔嘆巡遠忠今人凜凜更稱公唐家中厄宋季葉
勁草不折悲霜風嶮巇濤浪屢傾覆楚國南冠日痛哭
七尺甘為社稷死寸心尚冀中原復高皇蕩寇公魂安
崇堂俎豆朝衣冠祠廟千秋杜宇泣階墀百尺杉松寒
天青日白拜祠下肅如有風動屋瓦龍鯨矯矯想像難

獨有一言建祠者宋多節義昔無儔偕公勤王皆英流
讓生爭死趙與劉何不配食此江頭

夢遊勞山

昔聞人說勞山高巉巖萬仞摩層霄
卓午茅齋正高卧彷彿仙杖隨盧敖
長風吹衣度海水玉樓瓊閣重雲起
萬壑千岩朗不迷名花奇藥紛相似
坐對獅石窺龍巖長藤百尺垂松杉
靈風蕭蕭飄玉瑟瀑布細細開珠簾
逢萌幽棲如可覩竹解成龍杏伏虎
仙人獨坐玉虛岩

恍若目成不相語欲語不語凌太空海東片片丹霞紅
倏忽雷雨垂火澤頃刻日月開鴻濛覺來尚憶仙人曲
坐教三島生茅屋人世營營無了休枕上片時遊亦足

六駿圖

周王八馬何為者太宗六駿家天下何人揮灑入毫素
逸氣如雲汗流赭天閑十二玉花驄西極萬里能呼風
拳毛騶子殊可愛九良七跡七駒空的顱漫渡澶溪水
騅乎不逝徒為耳天策上將善駕馭四方豪傑從龍起

人馬相得意氣雄模糊雲錦驚飛鴻一破黑闥再世充
功成迥立明光宮時危草昧或賴此不吝千金就燕市
騰黃腰褭何代無但恐不遇九方爾天生絕足為英雄
鹽車鼓車難為功明王有道却走馬駿骨權竒伏櫪下

穀貴嘆

齊東野老行嘆息枵腹杖藜脚無力忽聞官糶到城中
赤手低眉淚沾臆往年斗米數十錢今歲青蚨百餘翼
穉子奔波類鵠形瘦妻伶仃如土色葦門採摘啖蔬甲

中產經營賣首飾大麥未黃小麥青東鄰已竄西鄰陪
三春無雨口嗷嗷百里絕烟心惻惻命危未免委溝壑
病起猶來看稼穡菽粟由來價轉高蠶絲屈指抽未得
災疹流行可奈何蒼天胡為至此極幸賴聖明減田租
不爾室家盡逃匿有司誰上流民圖征夫徒抱杞人識
救荒安得富青州佇望全生活鄉國

重七夕行

秋空無雲月正明銀河不動波無聲牽牛織女兩相望

烏鵲仙橋一道橫相逢共記爭相識天上雙雙罷畊織
自憐歡會能幾時且喜今年遇重夕西風桂渚生夜涼
仙裙玉佩含秋香只恐曉漏驚殘夢莫遣金鷄催斷腸
柔腸欲綰同心結樂極翻成怨離別怨離別一何苦不
見姮娥棲廣寒年年空學霓裳舞

前題

前月七夕月皎皎人家女郎都乞巧今月七夕更持針
仙裙玉佩何嫋嫋借問女郎欲何為前夕乞巧巧還少

往歲織女會牽牛烏鵲填河一度遊今年何幸得重會
新橋突兀風悠悠安得年年閏七月東齋載詠多綢繆
海濱老翁當此夕憂喜紛紛忽交積所憂世上巧者多
所喜女牛聊委曲憂喜疊來無了時爛醉庭前卧松石

前題

劉澄甫

此月此日重七夕銀河炯炯當牕碧牽牛玉軛幸再驤
織女金梭喜仍擲秋風裊裊天宇清秋露盈盈桂花白
一年一度尚風波兩夕兩情寧間隔世上萬事渺難期

漢外雙星會豈易兒女階畔羅酒漿烏鵲橋邊修羽翮
前月乞巧巧如何此日乞巧巧須並陳瓜列果復綺筵
結綵穿針競瑤席雲幄淹留軾帝車丹霞掩映支機石
風雲得會或偶然魚水還同轉生隙牛女再遇非等閒
上下重交真莫逆

夏日山中訪隱士

馮裕

南山深處栖雲翁茅菴結在懸崖東侵晨攜壺聊一訪
青松紫竹來薰風科頭箕踞坐仙石深杯共酌蒼顏紅

小橋西邊舞雙鶴
海天雨露拖長虹
流水從來厭世事
白雲相對談參同
雙眼望天發長嘯
乍疑杖屨游崆峒
日落遲遲欲歸去
疎林月出青山空

秋夜

金風昨夜過林麓
石田黑黍新成熟
穫來釀得雲安春
中夜隣家聞清馥
海天半月出東嶺
却憶高人在空谷
折簡呼童去相邀
藜杖迎將深巷曲
到來草亭忘主賓
試取葛巾聊躑躅
連呼五白看飛觴
耳熱高歌自擊筑

秋風漠漠叫鴻雁柴門寂寂留麋鹿興來拄杖上南山
一覽周天開醉目

馬遠枯木寒鴉圖

南宋畫師數馬遠閒作枯木寒鴉圖老幹槎牙仍上竦
歸羽翩翩時相呼朔風飄搖棲未定寒烟倒挂半有無
老懷對此亦冷落南鄰好酒方待沽醉來拂拭方東素
更寫鳳凰鳴碧梧

寒夜與友人共酌賞瓶梅

劉澄甫

草閣沉沉燈燼落山雲脉脉雪霰作柴門侵晚苦蕭森
石鼎臨牕甘寂寞故人誰為憫貂裘鄰友興來同野酌
忘機暖語不知寒折取江梅共酬酢數枝瓊蕊玉壺中
漏屋留香光綽約且須細細共流霞但覺醅醅對幽壑
梅花與友本無期我謂梅花足三樂雪裏憐渠花似冰
燈前顧我髮如鶴五更五點罷擊柝一盞一杯仍大嚼
天明客去余就眠近午垂頭夢寥廓

春雪

東風連夜彤雲起雪片霏霏數千里半消半凍花發遲
兩洋滾滾添春水南畝沾濡老農喜履穿愁殺東郭子
老夫憂喜總不知醉來獨隱烏皮几

前題

春風慘惻彤雲翻洛陽清晝卧衾安閉門彷彿聞霹靂
穴牕浙瀝窺團欒勾芒偶駕玉龍背屏翳却阻水巖端
始疑李萼迸階砌忽訝柳絮飛闌干紛紛委地消欲盡
脉脉隔簾閒自看江妃索寞舞帶緩素娥憔悴歌音慳

臺榭霏霏烟半濕鶯花寂寂愁不乾草庭語喋鳥間絕
玉壺影瘦梅彫殘元夕蕭疎少燈火豐年且免無饑寒

前題

黃卿

連朝微溫雲漸密曉時飛雪宵轉劇細數六花半缺全
擁巷浮堦不勝屐兒童競走玩瑤華白髮田翁獨嘆嘖
是時霖霖頗沾濡臘前況已見三白去年已日三尺強
上牋百果下損麥玄冥成功寂已退萬類正仰三陽澤
幸爾流鶯尚不來即為早鴻念羽翮溪南好事蒼江翁

冒寒折簡急邀客共賞新林綴莖萼莫待花殷方設席
酒酣風起日近晡四望杲杲遙空碧

春日山中尋泉

馮裕

谷風徐來春日閒醉呼童子尋寒泉杖藜穿雲二三里
桃花片片浮清漣沿流再行到山麓卓午遂得窮真源
清泠一掬濯我纓更洗兩耳祛囂煩泉傍有白石可以
當几筵山上有黃鳥可以當管絃一飲三百杯一吟數
十篇西嶺日沉羣鳥宿酒空月出方言還

過圯上懷張子房

彭城城外佳山水黃樓樓下日流峙濁河混混幾時清
長橋落落尚名圯每思漢室張子房一代風雲從此起
秦鹿持角無定蹤楚猴簪冠何足齒泗上亭長乃真龍
麾下將軍盡虎兕邂逅初從運籌策道義肯負全終始
壯士金鉞博浪沙亞夫王斗鴻門壘談兵早師黃石公
辟穀晚學赤松子明哲保身信有之蕭相韓侯徒爾爾

聽阮短歌

劉淵甫

燕歌楚舞世所美趙瑟秦箏媚高宴何處佳人來撥阮
衆樂無聲皆驚嘆四絃彷彿琵琶同鳳凰一鳴驚梧桐
素影連環抱明月清角往復悲回風楊花飄飄落江渚
野禽啾啾雜鶯語胡笳塞外多哀怨江州亭前泣羈旅
爭如月下聽鳴琴高山流水逢知音竹林千載亦奇興
草堂一夜清塵心

燕臺曲

黃卿

燕王臺映雲山蒼闔閭晨啟金輝煌清揚一人何時別

寶裝躍馬來觀光易水激灩西山青春風紫陌繁花明
御柳縈烟千萬縷綠牕曉夢聞流鶯牕外睨睨去不留
上苑笙簧調歌喉邯鄲舞隊吳娃館錦疊青樓珠帳晚
王孫公子擲眸珍鈿案喧唱金杯淺海倭進鷹矯凌空
大宛天馬足生風健腕驍臂相追逐名城嘖嘖誰相雄
南有鴛鴦北羣鵠梭間宛轉嘆復喜芙蓉紅簇蓮子堅
邊霜欲渡沙雁起千古燕臺峻且孤萬峯枕帶滄溟水

雲門山絕頂新構小亭

楊應奎

雲門高削金芙蓉晶熒空曠走游龍何處高人在空谷
乃向危顛結華屋亭亭獨立古石壇長風颯颯動高寒
星辰錯落手可攀玉女夜降錦囊翻自是孤絕可獨往
白榆朱草次第長軒棟虛白赴高巔吐納沆瀣心神爽

雲門書屋

劉澄甫

雲門壁立高崔嵬劈峯隱隱雙掌開千巖萬壑宗泰岱
龍飛鳳舞接蓬萊烟外樹吞大雲寺溪邊橋枕升仙臺
一逕窈窕若盤谷馮子幽居饒松竹年少欲勒北山文

選奇占勝終南麓不羨王君寶繪堂且營李氏藏書屋
案頭螢火乍昏明牕下鷄聲遶晨宿白衣卿相如等閒
碧山學士媚孤獨晴雲出岫賦歸來夜雨同心歌伐木
疑學宮牆過數仞更兼圖史傳心印父子行藏希孔顏
兄弟經綸致堯舜

聽雪

陳經

朔風夜度流沙黑海凍雲凝天地塞玄冥申令幻冰花
滕六迴車周八極碎窮屑玉一何輕填谷堙山杳莫測

蒼龍泣天竹亂折老鶴叫空松半踣寒聲騷屑屋隙入
冰威烈栗重帷逼披裘推牕開凍眼糝糊似入不夜國
金輪曉騰三尺高倏忽送出江山色陰陽慘舒未可窮
坐對南榮長太息

醉樵歌

有美人兮山之曲衣食無營採薪足得錢沽酒醉且歸
還向山中伐山木許許一聲天地空青山無人白雲宿

山泉精舍

馮裕

兩山重重泉曲曲高人傍此結茅屋蓬牕引入清風來
白雲常在簷阿宿堦前紫竹幾千竿架上牙籤三萬軸
淵明黍熟多釀酒陶然一醉東籬菊間山老翁日相過
擊節酣歌振崖谷

前題

劉澄甫

平生愛山復愛泉歲晚方謀海岱田三徑旋開著茅宇
百畝自為終天屋上清風烟漠漠堦前流水響泚泚
雨來樹杪嵐光出雲過溪頭秀色連衡門麋鹿忽驚犬

草席沙鷗却避鷺把酒吟詩索島嶼鮮衣延客醉花筵
采芝萬仞冥鴻逝濯足深潭抱石眠軒牕面面翠欲墮
池沼涓涓清可憐樵客劇談暫弛擔漁翁獨立亦忘筌
輞川素壁見圖畫桃源側洞生風烟北山移文任譏誚
東蒙泉石予老焉

九日來山文會

來山亭子苔徑斜野翁攜杖看黃花塞鴻嗷嗷向南去
日光淡淡浮雲遮主人清酒滿百壺羽觴來往飛沅霞

對酒賦詩發高興長箋矯矯橫龍蛇倒著葛巾籬畔舞
便是柴桑處士家

前題

劉澄甫

指點青山何處來松篁迤邐雲門開高人愛此結茅屋
重陽攜榼相追陪黃花萬朶幽澗下白鳥一聲曲水隈
把酒臨流成心賞西嶺日暮猶徘徊短髮緼袍風落帽
鴻雁忽送牛山哀佳辰良會不可斷深杯過罰無嫌猜
俯仰古今俱陳迹樂遊戲馬荒莓苔

九日對雨歌

馮裕

秋來日日望重陽
重陽正遇風雨狂
欲登堯山隔兩洋
山翁何處消愁腸
蓑笠且訪山泉莊
清風逼人轉覺涼
菊花欹斜片片黃
風飄滴滴來清香
東籬共對飛霞觴
昨夜堦下聞鳴蟬
今朝秋光遍八荒
漉酒高歌興初狂
利名視之如粃糠
餐英飲露聊徜徉
恍如屈子遊瀟湘

馬遠孤舟秋泛圖

澠谷堂中開玉壺高懸馬遠秋風圖孤舟纔放楓葉落
魚龍寂寞蒼峰孤隨風放入五湖裏天水茫茫兩相似
舉杯痛飲向青天今日纔知范蠡是

巢山行

聞有高人慕巢父輒向深山結茅宇西南茅茨八九間
父子相將避風雨坐話重玄無古今欲說典墳非訓詁
春來聽鳴禽橋邊倚高樹夏日枕清流秋成多餘黍冬
看寒雪白滿山修竹寒梅對清醕四時相代樂無涯不

美人間簪與組我今特作巢山行憑誰寄與勞山主

前題

劉澄甫

平生喜讀山居賦未老投閒入烟霧戶外新栽五粒松
岩前舊種三株樹破屋羣峯翠復連野籬亂水青相護
山人何事獨愛山環堵風雨身自閒芳草連天迷石榻
白雲滿地封柴關漁樵路近時逢語虎豹叢深未可攀
升高選勝忻卜築植柳移花看馥郁燕雀相賀繡幕安
鷓鴣却笑卑枝足迤邐王維在輞川迴旋李愿歸盤谷

每思富貴履危機爭若巢山常掩扉酒學淵明多種秫
菜傲夷齊自採薇百年回首眼中少是非榮辱將同歸

郊園新雨移竹行

楊應奎

郊園四月新雨足萬木崢嶸惟欠竹慙勤移植雨三竿
便覺條然遠塵俗棲鸞鳴鳳未敢希拂石掃壇還可掬
眼看捲地飄龍鱗會見參天倚寒玉朱簾掩映留風聲
綺疏參差穿月窟同與七賢結伴遊追憶二妃懷湘瀆
植杖恐作葛陂龍釣璜難得渭水宿稍雲無葆綠陰濃

笋穿節比在倏忽此中夷猶適真態藜藿充腸貧不戚
莫嘆人間有大嚼得此輕彼過食肉

夏中雨後適郊外莊

劉澄甫

長夏炎天氣鬱蒸火雲酷烈烟光凝脫帽披襟遵茂樹
園蔬自摘儲層冰農人望雨如望赦終日甘霖似傾瀉
池邊幸爾廕松篁郭外忻然看禾稼攜杖閒來尋白鷗
肩輿偶出問丹丘溪流活活添新沼杞柳蓊蓊生小洲
柴門夜靜眠鳬鴨甕牖朝涼動紈簟壺醕初分味頗佳

野翁對酌情偏洽
溽暑可奈暫盤桓
幽棲得慣輸平安
茅齋五月豈覺熱
此身百歲輕無官
圖書插架高連屋
欲賦歸田種新菊
郊原日日遂遊課
一枕羲皇老空谷

海岱會集卷五

欽定四庫全書

海岱會集卷六

五言律詩

人日

黃卿

人占逢七日春立已三朝岸柳催晨發
河漸併夜消山猶含白雪雲自綴青霄
笑向閭閻說熙雍賴聖朝

春雨

陳經

南畝遲靈雨東風釀夕陰青痕縈冷砌
蒼靄幕空林霰

霖同春淺飄颺入夜深籍田先潤澤應慰聖人心

上巳

馮裕

柳溪元已會鶴髮兩三翁蘭葉香風細桃花曉露紅探
春平野外載酒曲流中高調蘭亭侶吟詩興味同

黃鸝

四月轉清和流鶯百囀歌啼殘垂柳暗飛蹴落花多寂
寞懷人處間闕奈爾何雙柑攜斗酒且得慰蹉跎

刈麥

麥隴秋先至農功歲序分半天懸赤日萬頃落黃雲共
說豐年樂何妨社酒醺頌聲從此作應許續思文

前題

劉澄甫

川麥黃雲盡川迴碧水閒涼風生綠野暑雨暗青山鷄
黍時能約牛羊夕自還捕蛇如免稅射雉且開顏

積雨

馮裕

霖雨何多日占晴檢朔書埵沙仍集鶴渠竇已生魚莽
莽瓜田白瀟瀟草閣虛愁懷無處著好學五湖魚

野望

黃卿

遠郊涼思淨晚照古原斜無復壯遊興轉憐晴望賒山
光界未黍海氣閣雲霞不辨鳶歸處翩翩急暮鴉

八月十四日夜月

馮裕

別墅中秋近天空月轉高踰弦增皎潔隔望欠纖毫玉
鏡涵蟾影金波漾海濤嫦娥許再會永夜醉香醪

十五夜月

淨掃茅亭坐溪山度晚風雲開三極北月滿九秋中丹

桂霓裳曲清樽鶴髮翁古今吟賞興誰似庾樓雄

十六夜月

仲秋十六夜月出照清溜素魄光無減水輪上較遲影
隨雲漠下涼逐海風吹逸興應難盡高歌送酒卮

十四夜月

劉澄甫

山月光初就秋宵漏欲平倚樓人獨立栖樹鳥頻驚色
借露華白影移蟾桂清因知明夜好有待生三更

又十五夜月

天上中秋至商風薄暮寒橫波金縷細隔樹鏡輪安不
減前年興誰同永夜看素光照華髮應惜此宵難

又十六夜月

黃卿

重玩憐秋度持盈亦爾疑金波如未減皓魄稍升遲寒
動明河色晴標永夜姿一罇籌漏滿重訂隔年期

古鏡

石存禮

古鏡何年治千秋尚此留玉臺虫網暗珠匣土花浮莫
笑塵埃滿能令鬼魅愁生平寥落意對爾思悠悠

九日登北山寺鐘樓

樓閣倚中天登臨思渺然閒身空歲月老眼幾山川落
照明秋浦飛帆濕暮烟凭闌悵陳跡餘恨付詩篇

前題

黃卿

菊節寒留寺鐘樓早見山客緣佳景至僧共野雲閒秋
鶻忽驚影風鴻自綴班尚思千仞塔絕頂眺塵寰

前題

劉淵甫

寺樓舒望眼重九當登臺木落郊原濶霜空鴻雁哀自

鳴鐘應律值閨菊遲開短髮羞佳節相憐數舉杯

擣衣

馮裕

良人久北戍況值秋深時砧杵月中急雪霜關外滋
忽聞征雁過已覺寄衣遲何日勾奴靜東山更賦詩

前題

劉澄甫

九月堪授衣三邊人未歸暮碁催短日霜帛捲重扉
落手隨高下停鍼憶瘦肥殷勤付鴻雁何日到金微

前題

劉淵甫

明知秋已晚
砧急露風寒
清響雖同發
憂腸各未安
能辭午夜倦
將送遠方難
此夜無衣客
應從隴上看

對竹

石存禮

門對南鄰竹
青青玉萬竿
何勞買地種
且得隔籬看
露葉晴猶濕
風枝夏亦寒
長年無剪伐
托汝報平安

百丈崖

劉澄甫

瀑布垂千尺
飛流銀漢低
雲松攢玉殿
鳥道上丹梯
見日窺滄海
凌空聽碧鷄
登臨興不盡
岩壑晚淒迷

歸雁

石存禮

雁來何太早
嘹唳過南樓
數點乍離塞
一聲初報秋
行驚老眼字
字寫新愁
仗節人何在
鄉書可寄不

前題

馮裕

衡陽春色早
羣鴈早知歸
行入江雲杳
聲飛塞月微
隴愁深戍客
漢信滯明妃
若悟銜蘆意
何如守釣磯

前題

劉澄甫

斷續瀟湘去
迢遙關山歸
夜寒翻警枕
霜老欲添衣
風

雨幾時定稻梁何處肥
隨陽限南北恨別轉依依

鵲湖

馮裕

昔年秋興逸每泛鵲山湖
亭下採新藕船邊回野鳬
滄浪歌正激白露酒頻沽
何日重遊此清風月滿蘆

前題

劉澄甫

歷下名園盛家家湖水清
石橋斜入浦竹淑曲侵城
進艇分山色彈弦雜鳥聲
遙憐採菱女兩兩踏歌行

蠲稅

租稅年年急瘡痍何日蘇幸逢寬恤詔將慰海邦逋妻
子仍無地謳歌半載途家家共牛酒歡賞願須臾

織婦

黃卿

機下忘梳洗燈前勸飲餐薄帷當月近東素競霜寒女
伴勞相問嚴姑恐未懽風流金翠過不敢出門看

文會

禪房資臘澤禮飲定蔬盤有石堪攻玉如金更臭蘭笑
談僧共坐杖屨俗驚看投老隨黃綺無心問漢官

雪晴

劉澄甫

入夜同雲密平明霽景饒
白添山骨壽紅見海霞標
玉馬時應出瓊枝煖欲消
盈虛占物理甘分卧蕭條

前題

劉淵甫

積雪且遲掃開晴頗散愁
閒庭無鳥跡擁坐有羔裘
素館映虛白清尊缺獻酬
扁舟如見訪好為戴生留

迎春花

馮裕

春意朝來動園亭看早芳
濃香分北海巧笑逐東皇
餘

潤留殘雪先資借太陽還輸梅一著至日倚冰霜

山寺閉關

劉澄甫

野寺經遊少寒山早閉關月沉松影寂雪咽水聲閒客
散僧仍定雲歸鳥亦還靜中有真意外可容攀

負暄

馮裕

炙背茅簷下無衣卒歲難應憐趙孟日暫解范生寒歎
息貂裘敝瞻依廣廈寒晴暉無可報只益寸心丹

前題

黃卿

野翁移草坐簷下日當中瘦影身相較暗曛物與同惜
年驚度臘呼伴避當風為問趨炎客安知造化功

初風晴望


馮裕

春曉扶筇杖天空野望開四川雲影盡萬里風聲來海
暗仙人觀城荒仲父臺古今成俯仰倚樹且銜杯

前題

黃卿

遠望遲移午餘寒立轉溫閨催春有色晴解凍無痕柳
暗青山郭鳩鳴碧樹村幽人別有興不待百花繁



海岱會集卷六

欽定四庫全書

集部

海岱會集卷

七至
十二

詳校官中書臣孫衡

侍讀臣孫球覆勘

總校官降調編修臣倉聖脉

校對官中書臣潘曾起

謄錄監生臣周敦復

欽定四庫全書

海岱會集卷七

五言律詩

東郊

石存禮

為愛東郊好，筇枝伴獨行。
花香能醉蝶，柳色欲迷鶯。
但得青春在，何妨白髮生。
斜陽紅盡處，一片暮山橫。

前題

馮裕

散步東郊外，春深景物繁。
高低楊柳岸，紅白杏花邨。
海

氣分陽彩山容減燒痕方思谷口客移杖過柴門

前題

黃卿

出郊常是嬾學曠近為真潤野當膏雨聞鶯偶仲春入
村須住步隔水共招人但恐桃源失尋遊豈厭頻

謁倉頡墓

楊應奎

兩粟書初兆結繩風漸移巧因鳥跡出象應馬圖垂制
作今逾麗儀型古莫追翻思文勝日托始有餘悲

海燕

馮裕

秋返烏衣國春來玉水隄興衰殘照裏王謝畫梁西曉
幙參差過晴絲掩映低宮中曾第一應憶上林棲

前題

陳經

適至從何處來巢白玉堂芹香眠翠羽花暖伴鶯簧入
幕甘棲托冲霄任頡頏有時秋氣逼亦復返江鄉

雷

劉澄甫

殷殷南山動轟轟北極回卧龍能自奮甘雨尚須催酷
暑聲應掃妖氛震欲開九天流解澤先向海邦來

桂花

石存禮

雲堦有叢桂枝幹蛟龍翔天霽開金粟秋高對玉觴燕
山傳勝事蟾窟散餘香欲倩騷人筆重書招隱章

漏屋

馮裕

茅屋幾時雨棲遲欲斷魂青苔紫土壁流水出柴門懶
隱烏皮几愁開綠酒尊晚來聊一望四野尚雲屯

上大雲寺

石存禮

山險疑無路縈迴一徑通鐘聲瀑布外塔影夕陽中窻

出茶烟白爐分松火紅禪房招隱處清話幾人同

前題

劉澄甫

寺隱青雲杪門當碧石隈自開西磴菊誰翦北山萊細
雨曇花落危巖鳥徑回上方清梵宇人世隔塵埃

前題

陳經

披徑尋祇苑盤空躡白雲山門通上界石室藹清氛夜
鉢看龍蛻秋巖識鹿羣還聞飄桂粟花雨共紛紛

秋日有懷藍北泉

馮裕

昔年驄馬過山郭有光輝對酒邀明月尋詩歷翠微夜
深還共坐春到便言歸好謝南征雁銜書向北飛

前題

陳經

仙境懸東海高人憶北泉地鄰蓬島日宅近蜃樓烟秋
水蒹葭遠霜空鴻雁偏乘槎會何日藉草一談玄

重脩富公遺愛亭

古廟千年圯靈臺不日成雲浮新棟宇苔洗舊碑銘惠
澤存先哲儀型媿後生可憐仰止地徒有漫遊情

又

丞相祠堂舊今朝勝槩增冠裳秋水集羅綺暮雲清
醞薰蘭渥芳肴雜桂蒸何人懷古意惻愴意難勝

晁錯受經圖

楊應奎

經自伏生授言從玉女傳秦灰方冷後孔壁未開先文
武存方策唐虞在簡編何人圖盛事仰止媿前賢

牧牛

石存禮

有客西臯下力田還讀書東風春野綠朔雪夜窓虛芳

草眠黃犢香芸走白魚
俛寬千載後誰伴帶經鋤

前題

馮裕

爾牛來濕濕牧事付村童
細草三春雨疎煙一笛風
寢訛青野外陟降夕陽中共喜
維魚夢年年屢報豐

夜坐

石存禮

空齋伴獨客寂寞似僧家
爐冷頻燒葉燈昏不結花
夜長思往事歲晚惜年華
不寐推窓坐茅簷月未斜

前題

馮裕

永夜南軒坐依稀到夜分星晨旋北極河漢度流雲皓
首栖蓬華孤忠想曝片寒階聽鶴唳疑對玉宸君

前題

短燭頻移刻良宵不問更坐疑天籟息興與月華清晴
漢星如滅風林鳥誤驚那知車馬客緣底尚西征

前題

陳經

金壺傾漏緩烏几倦更長數息疑禪定齋心學坐忘裘
溫貂續短爐冷鴨添香問夜移衾枕山城月轉廊

聞柝

劉澄甫

月明人語寂霜落柝聲寒
斷續齋鈴雜清幽戍角殘
金吾傳夜警玉漏送更闌
羈旅愁無奈闌城卧未安

前題

陳經

霜風吹夜柝明月戍樓初
閣迥連雲響山寒應谷虛
嚴更疑漢署禁直誤周廬
滄海孤城夕遙天憶帝居

春寒

東皇初布澤北海尚多寒
凍水纔分谷光風未轉瀾
榆

添新改火貂戀舊彈冠會見芳菲意融融獨倚闌

人日野眺

石存禮

七日逢人好頻年望眼賒塞雲晴度雁城日曉翻鴉漸
下先春水梅開隔歲花居閒何所事端坐誦南華

早起

馮裕

山居常早起幽興曉全濃步履披春草開簾度曉鐘
亭留月色黯黯見山峯樵唱忽過徑朝暉透檻松

前題

劉澄甫

在家無俗事早起意何如
種樹滿荒徑移花向近閭
閒愁苦不寐短髮倦頻梳
預約南溪老侵晨學釣魚

前題

陳經

為惜韶光好尋芳欲及晨
鏡中猶未老塵外且閒身
晞髮扶桑日披襟滄海春
熙熙觀物候拂曙五雲新

又

春睡何曾著荒園幽事知
斷雲饒種竹壘石曲通池
招客嘗新酒科頭改舊詩
適時惟老圃自笑學樊遲

山行過僧菴不入

石存禮

曉起誰同步尋幽思不羣逢僧看竹去吹笛隔林聞山
勢浮雲合溪流野水分徘徊歸晚逕樹影月紛紛

前題

陳經

蘿逕盤青靄松門隱碧岑野雲看不極禪榻倦重尋樹
斷浮幢影巖虛落磬音何須支遁話已覺淨塵心

元夕聞讀書聲

馮裕

淑氣回新律風光轉上元千枝花照夜萬戶月當門城

角人家過書聲草屋繁杖藜聊佇立指點示兒孫

海岱會集卷七

欽定四庫全書

海岱會集卷八

五言律詩

曉鐘

馮裕

春眠嫌夜短，忽聽曉鐘鳴。
度竹來虛枕，穿雲響太清。
悠悠晨夜界，脉脉古今情。
獨起披衣望，瀛洲曙色明。

前題

劉澄甫

何處鐘聲息，楓林早夜聞。
白頭愁已過，清夢耿初分。
斷

續秦樓月悠揚楚岫雲閒身常晏起牕影任高曠

前題

陳經

霞起重城曙鐘傳古寺風喚回清夜夢香入白雲簾一
卧淹滄海三年別漢宮覺來動深省山月照窓空

前題

黃卿

滄海躍靈起蒲牢五夜鳴星河分曙色風雨約鷄聲度
自樓臺迴聽連鼓角清晨光已今日感慨萬緣生

洋溪逢漁父

馮裕

春時洋水曲邂逅見漁翁把釣苔磯潤停雲夕照紅相
留惟濁酒共醉倚清風萬古浮沉事都歸一笑中

前題

陳經

溪上逢漁父幽談坐夕陽潭雲過水白岸柳覆橋黃鷗
鳥機初息滄浪興轉長欲窮垂釣意鼓枻入蒼茫

前題

黃卿

城隱清溪曲行逢滄海漁常憐魚鳥伴莫道網綸疎樹
色橋頭徑鷗羣柳下渠長歌欸乃調歸棹入烟墟

早春小圃桃花欲開

陳經

青帝無私澤園桃花欲然
蓁蓁新綠嫩的小紅鮮色
映宜歌扇香浮近酒船會
須看結實方朔與同憐

前題

黃卿

浸尋春到處佇立小桃傍
纖錦分苞嫩新脂幾瓣香
依依如有恨脉脉未成粧
此際堪臨賞翻嫌爛漫狂

觀稼

石存禮

晨隨田父去薄暮始言還
遠水鷗邊渡夕陽牛背山
一

秋生事急百歲幾人閒
野鳥投林盡相看
只厚顏

前題

馮裕

天地忽新秋
秋風禾黍稠
攜樽開北海
拄杖過西疇
山外迴晴景
村邊起暮謳
偶然逢野客
談笑未能休

前題

劉澄甫

薄田慚負郭
晚稼望東隅
水閣搖花鴈
山風落井梧
免葵聊自慰
雀黍為誰驅
暑雨經旬日
倉箱未可圖

前題

陳經

野望天無際
油油禾黍成
青黃秋雨後
隴畝暮雲平
社鼓村村樂
雲舂處處聲
田家新酒熟
扶醉道相迎

謝故人惠葵扇

故人遺我扇
紉素豈堪云
價重千筠製
身輕一葉分
傾陽存舊質
却暑策高勲
未忍捐簞笥
時時憶見君

晚涼洗馬

馮裕

偶來高樹下
坐看浴驂涼
入迴溪淨陰
連古木稠人
猶憐暮景馬
亦愛清流似
識追風足
超騰意未休

前題

陳經

夕苑飄涼吹金隄浴紫騮追風聊息足汗血尚存韝喜
與龍為友羞將玉絡頭漢家重天馬應向渥洼求

人日迎春

石存禮

七日逢人好東郊始迓春青陽為故物白髮亦新人鼎
鼐調羹業乾坤報國身年年無外事詩酒度芳辰

郊遊看竹

楊應奎

郊原籬落外誰種翠琅玕鳳尾蕭蕭舞龍根寂寂蟠水

浮春色淨沙護野雲寒試問同遊客何如林下看

穀雨

馮裕

又驚三月半載酒過清溜甘雨應時落新苗到處滋開
畦勻綠水策杖聽黃鸝好謝南隣叟春來屢寄詩

夏初雨中對酒

初夏園亭靜南風好雨來閒堦披細草濁酒瀉深杯牧
笛青蓑濕漁舟短棹回乾坤添爽氣此景即蓬萊

問園丁幽事

劉澄甫

頻年學老圃幽事近何如
抽笋沙勻砌移蔬水滿渠
隔窓呼倦鳥臨檻飯遊魚
夏簟貪長日閒居賦自書

松陰

小院孤松樹清陰坐撫時
蟬聲歲密葉雀影寄喬枝
寂歷子初落遲回日不移
盤桓須盡興愛爾共襟期

送陳東渚北上

石存禮

祖帳憑雲閣揚旌擁路衢
寸心依魏闕長珮謝蓬壺
勲業虞三禮文章漢兩都
明良須此去何以慰樵蘇

夏夜

石存禮

獨坐萬感集高城初漏過起行明月底靜看落花多林影沾清露池光接絳河終宵愛涼爽不問夜如何

前題

黃卿

閒極覺宵永坐深知露涼遣懷聊命酒愛月屢移床北斗迴杓近高城下漏長懷人無限意詩寄水雲鄉

前題

馮裕

日落空堦坐南風不肯來銀河空皎潔螢火轉徘徊忽

聽鄰鷄唱頻驚漏箭催依依山吐月顧影上蒼苔

水閣

石存禮

草閣經秋淨柴門傍水開捲簾青靄合倚杖白雲回點點螢高下翩翩鳥去來林泉搖落意有興且銜杯

前題

楊應奎

岸柳垂陰密蓮池布葉齊簾櫳回曲檻梁棟蔽高題燕坐風生腋微吟月滿溪偏宜乘興飲無問曉鷄啼

息陰

馮裕

息陰芳樹下草木有餘清海月微茫出山雲次第生野
烟籠曙色爽籟發秋聲自得悠然趣都忘軒冕情

前題

劉澄甫

老嫌筋力倦息愛樹陰涼壺醑留連飲藤床到處將卧
分沙鳥席坐傍水雲鄉日暮遲歸詠蕭然世慮忘

小園

小園鋤菜甲早起課園丁開徑惜芳草看花護落英烹
葵朝入饌翦韭夜炊羹客至慚供給盤飧遠市城

秋思

商飈起金屋黃葉滿珠樓情逐流螢夜思隨紈扇秋青
苔朱戶閉白露絳河流芳思誰能識深宮倚暮愁

秋夜村雨聞蛩

馮裕

新秋聞蟋蟀雨過正黃昏斷續空堦下淒涼暗草根懷
人應不寐隱几欲無言九月茅堂夜吟詩倒綠樽

秋夕憶隱山上人

高僧飛錫去野菊正芳芬瀛海秋宵月滹沱日暮雲獨

行山曠寂靜坐夜平分歲晚歸禪院焚香洗印文

前題

劉澄甫

飛錫出青山緇衣幾日還夜窓松雪暗石榻野雲閒煮茗洋溪曲談詩蓮舍間遠公不可得誰共一開顏

賦得原上草

新綠連洋曲沿溪風正輕意含郊雨潤色藉海雲平愛近花裀坐愁紫柳帶生王孫歸未得悵望若為情

前題

劉淵甫

原上年年草王孫復此行漫催人去住遠與徑縱橫雨
潤柔還綠風吹萎更生幸隨時序發蘭蕙敢齊名

春晴小園眺望

劉澄甫

竹籬停夜雨鳩杖倚春晴色映池邊草聲傳樹杪鶯移
床惜花落開牖見山橫自負差強健登臨眼倍明

初冬宿田舍

石存禮

委曲疑無路幽深別有天偶披青嶂入得與白雲眠樹
密歸寒鳥溪迴響暗泉草堂終夜寂高枕聽鳴絃

春日過城南野老村舍

陳經

花塢春深好城南原上村入雲茆結屋近水竹當門野
犬來迎客山櫻笑映尊坐長幽興愜歸路欲黃昏

海岱會集卷八

欽定四庫全書

海岱會集卷九

五言排律

登廣固舊城懷古

陳經

下馬尋孤壘登高俯舊城
龍岡盤地險雉堞與雲平
東望滄溟會西瞻泰嶽迎
四山屏亂立一澗帶相縈
十二倂秦郡膏腴擬漢京
封疆仍晉服巡狩尚堯名
蔚蔚林臯接油油禾黍成
斷崖蒼蘚合絕壁紫烟橫
野鹿驚人

過村鷄出樹鳴川陵互變易冠蓋幾枯榮闌闌夷丘隴
人家伴牧耕霸圖何寂寞淒惻不勝情

七夕日會集隱山方丈海亭酒味欠佳酤以代
之
馮裕

上界三天外嘉辰七夕秋瑞光凝漢渚靈匹會牽牛白
帝新涼入清高舊暑收尊携江夏酒話共遠公遊社擬
開蓮集杯疑渡海浮座中聯俊彥方外得清幽誦偈猿
求聽談經鬼亦愁鴨鱸騰紫篆龍鉢注黃流不見齊從

事翻逢魯督郵既興歡伯歎復重麴生憂餅榼深蒙恥
茶瓜亦起羞目懸張掖使吻渴醉鄉侯村舍金魚換山
門玉帶留雲安春可贖桑落遠堪謀綠螳分壚畔青蚨
解杖頭洗厨重辦饋移席更相酬院竹飄竽籟曇花送
酒籌曠懷傾北海高義重南州雲水超真悟乾坤豁醉
眸家鷄輸野雉座客漫夷猶

人日逢春

劉澄甫

七日人皆得三陽氣始新縷金傳舊俗盤菜送比鄰暮

景逢晴旦幽居喜正晨薄寒疑嶙峋輕煖透逡巡栢葉
消殘雪蘆灰起細塵梅粧還貴艷柑釀逐清貧陟覺天
時泰俄瞻地脉伸名花紅翦勝柔草綠抽茵餅餌甘粗
糲衣冠媿縉紳仙樓春縹緲漢殿晝嶙峋朝謁希疎出
羅幃賜予頻條風紆禁籞冰凍暗江津北海多岑寂東
郊接隱淪琴香誰逸興歲月此閒身早起勤為拙宵眠
懶近真青山開化育白屋掩柴筠杜老愁須破坡翁意
自親雲翹翻袖舞彩帳揭華闥嘯傲牛呼馬招搖斗指

寅年年讀書舍應共太平民

送陳東渚北上

五鳳司喉舌三齊表縉紳銀臺仍筦鑰畫省舊臣鄰日
近彤樓影香飄紫閣塵斗邊黃紙下山畔白雲屯閱
移忠孝交親盡主賓松筠堅氣節冰雪飽精神暫得
帷駐行當要路津何妨隱金馬正值走蒲輪青鎖經
遊慣黃扉出納頻龍墀通密勿楓陛聽絲綸接武
夔龍踵分憂丙魏身衮衣明日月錫服繡麒麟
豈望彈冠慶還

瞻結綬新忝予白髮友羨爾紫薇臣蓮社盟猶在鷄壇
誼已伸琴香消暑酷金石托情真乘醉吟花下投閒釣
水濱風烟重離別書札慰沉淪

海岱會集卷九

欽定四庫全書

海岱會集卷十

七言律詩

登潼關望河

馮裕

獨上重城思渺然，黃河如帶接秦川。
險周三輔疑無地，勢逼雙峯却近天。
函谷牛來聞道日，華山馬散偃戈年。
關河百二今猶在，萬里常清紫塞烟。

杏邨酒帘

石存禮

春在山巔與水涯酒旗深巷有人家也知物態隨時序
但惜年光改鬢華落日疎林低度鳥東風平野亂飛花
晚來扶醉長歌去馬首殘烟點暮鴉

除夕

劉澄甫

今夕何夕歲華盡明日明年淑氣回坐惜寒梅銷臘雪
起沾膏雨灑春臺蕭蕭白髮新仍故落落窮愁去復來
綺席忽開東舍竹衡門高詠北山萊

前題

劉淵甫

蕭然燈燭共誰親
芋栗幽居且耐貧
相對妻孥猶送臘
起看星斗忽迎春
百年入眼同今夕
萬事勞形總未真
不向天涯悲寄旅
浮沉常作故園人

元日

黃卿

海國東風暖復輕
天鷄迎日報新正
兒童解逐斑衣舞
兄弟相依栢酒傾
半夜笙簫聞碧落
萬家烟火啟嚴城
野人惟有豐年望
先指農祥淑氣生

人日

石存禮

人迎人日歲迎申和氣祥風遍八垠萬井笙歌歡動地
九堦燈火慶逢辰白頭濫與香山會素節寧甘菽水貧
尤有丹心依日月肯教寒谷不生春

前題

馮裕

正月七日好天氣南山映日騰嵐光野客共傳栢葉酒
麗人爭學梅花粧小橋冰泮響流水古隄風暖柔垂楊
老來不解遺絲勝祇覺菜羹滋味長

春雨

劉澄甫

霏微輕雨寂無聲
杳靄青山闇有情
風轉蕙蘭光冉冉
香添桃李秀盈盈
愁空臘雪甘貧病
喜接春雲妬晚晴
茅店酒帘喧社鼓
杖藜隨處問清明

苦熱

石存禮

汗背天街馬上行
葛衣誰說著來輕
風微團扇難為力
月伴空庭坐到明
玉檻桐枝陰欲上
銀塘蓮葉露初盈
清涼却憶江南路
兩岸蒹葭秋水生

書院松濤

楊應奎

精舍陰陰萬木稠，隔牆遙望翠雲浮。
波濤終夜驚成拍，風雨連朝聽不休。
勁氣偶同天籟發，潮音應傍海門悠。
空齋得此消岑寂，一榻冷然爽若秋。

劈峯夕照

劉澄甫

秦帝鞭山走六丁，巨靈雙掌破青冥。
危峯截葉窺滄海，返照微茫落翠屏。
圖畫何誰開晚障，乾坤留此結茅亭。
十年耽爾成真隱，不必移文問勒銘。

富亭遺愛

劉澄甫

青社風流憶富公山川詩酒日融融
春耕問俗雲門下秋水觀濤石澗中
半榻冰簾飛碎玉幾株棠樹落疎紅
荒亭故老談遺愛牧唱樵歌感慨同

海樓秋月

馮裕

獨上高樓望海洋娟娟纖月出東方
六鼇仙跡疑虛幻一雁秋聲正杳茫
光溢桂輪連蜃氣影浮蓬閣動霓裳
夜闌徙倚忘歸去銀漢西垂清露涼

花林野趣

劉淵甫

碧水青山何處村
百花千樹半柴門
山藏柳市無車馬
水隔桃源有子孫
問舍地偏為得計
尋芳心遠遂忘言
悠然迥出塵囂外
垂老猶矜興味存

雨後試牛耕

馮裕

雨晴原隰正勻勻
農事今年又一新
聞鳥每驚林外曙
試牛先破隴頭春
青郊潤色還通海
洋水田間却似幽
良耜好音應有續
欲將椽筆倩詩人

中秋對月

石存禮

桂花秋月兩同開
素魄天香入酒杯
幾點青山當檻落
半簾清吹拂衣來
追思王子登緱嶺
擬訪安期到越臺
引領十洲方丈近
五雲隱隱護蓬萊

澗泉濯足

馮裕

雨晴雁過覺新秋
載酒西郊試一遊
即擬褰裳來碧澗
漫同濯足向清流
岸高松老一聲鶴
風動萍開幾點鷗
忽見白雲生脚底
赤松應伴老滄洲

石床

劉澄甫

幽人高卧石為床，興在蒹葭水一方。但共野雲巖際宿，
不随蝴蝶夢中狂。枕流洞口蒼苔淨，挂席門前薜荔香。
惟有青山足屏障，何妨白日到羲皇。

藥圃

劉澄甫

老圃新開芍藥闌，傍山臨水足盤桓。紫青繚白山光遠，
帶雨梳雲水氣寒。佳客淹留供逸興，老夫珍重寄餘歡。
衡門也得消殘歲，嫩蕊陳根並可餐。

謁王沂公墓

楊應奎

前朝人物繫鄉思，勲業功名世所推。
下馬西風傷往事，卧麟高塚慘當時。
白楊裊裊吟霜葉，蒼蘚斑斑點舊碑。
立志誰能忘溫飽，孤墳瞻拜一淒其。

山行

劉澄甫

出郭行行到處山，春流泯泯鳥關關。
孤霞遠映晴川迥，小洞幽含白晝閒。
為愛嵐光遲遠眺，却羞花信對衰顏。
流連晚坐西峯下，倚杖瞻雲獨往還。

前題

馮裕

策杖南山幾日行石田亦自有人耕
遠尋碧障三千尺
薄采瑤華四五莖
瀑布飛來龍洞香
松雲散盡雀巢輕
何當子晉來相訪
共向峯頭弄玉笙

雨中對菊

馮裕

節過重陽三四日
東籬更對黃金花
滿天風雨久蕭索
一莖霜霧時欹斜
寒操頓移心獨苦
白衣不至酒須賒
醉來百事都忘却
好是柴桑處士家

山中有懷寄知己

黃卿

石屋依樵劇始成
忘機猿鹿解相迎
重名不羨陶弘景
多事還輸向子平
招鶴獨穿幽竹徑
彈琴時聽細泉聲
舊遊悵望征鴻遠
欲寄白雲百感生

冬日過范泉精舍

馮裕

畫面青山一畝宮
霜紅菊徑細泉通
土堦剩見藤蘿月
石井徐來松竹風
盡日讀書應自得
閉門覓句許誰工
黃柑紫蟹葡萄酒
常對清狂鶴髮翁

盧溝橋

劉澄甫

盧溝南下水湯湯萬石嵯峨白玉梁地窟鼉鼉驚出沒
海津荏葦接微茫鷄鳴上谷寒雲暗月落西山曉色蒼
冠蓋往來詞賦客有誰題柱獻長楊

前題

黃卿

黃金臺畔卧虹橋神宇經營壯聖朝薄海梯航通萬國
經年車馬徹中宵山開雪石孤標峻河愛風濤衆壑遙
正是邦畿全盛日兩街樓館沸笙簫

冬夜聞琴

沉沉道院冷侵衣有客鳴琴傍翠微古調悠揚玄鶴舞
新聲寥亮白雲飛知音應是慚鍾子得意何須嘆楚妃
彈罷夜深人不見海天寒月下漁磯

獨酌

石存禮

山樽得酒且高歌百歲流光一夢過病眼看書真處少
老懷追事謬時多髮隨落葉驚飛絮門掩蒼苔惜逝波
今古英雄只如此浮生不飲欲如何

禪房

劉澄甫

蘭若初開祇樹林僧房花竹自蕭森
曉堂雲散忘機事夜鉢龍蟠見道心
絕澗窓臨千尺雪孤峯門掩一床琴
客來欲問維摩詰默坐無言海陸沉

觀獵

石存禮

杖藜曉出郡城東校獵咸觀騎射同
一路行雲隨去馬半空蜚鳥避彎弓
川原路盡重圍合笳鼓聲高落照紅
共羨長楊能獻賦相如久已讓才雄

冬夜聞雨

寒夜沉沉轉二更忽聞凍雨起飛聲斜飄天上松濤細
亂灑庭前竹葉鳴投老祇應眠海曲避人曾不到山城
曉鐘欲斷寒仍甚滴盡空堦夢未成

苔錢

劉澄甫

霏微細雨落花鮮亂點蒼苔積翠連竹徑豈貪金作埒
茅茨真喜碧如錢兔園鋪錦璇臺潤梁苑分香畫閣妍
爭似野夫門自掩飽看秀色老林泉

催海棠未開

陳經

東風小圃海棠新蓓蕾相看色漸勻
半吐似迎三月雨欲開猶惜一分春
輕寒薄霧休相妬舞蝶遊蜂未可親
誰謂含愁獨不笑幾回移酒問花神

至日寺中小集

劉澄甫

往時至日集朝天今歲山城野興偏
鐘鼓悠悠連上界松篁寂寂映青蓮
玄雲回朔爭新律白雪知時定有年
擬向旃檀盟舊業請歌賓主戒初筵

臘日

黃卿

嘉平冉冉收殘歲高會依依復上方晴濶郊原紛較獵
午深臺殿罷焚香山人獨憶幽冰晚鄉俗空傳魯蜡狂
無耐三農仍望雪日融雲白轉堪傷

雲門絕頂新構小亭

石存禮

江漢遨遊興渺漫雲門絕頂始躋攀小亭飛構當今日
高閣宏開壯此山寒繞石闌烟靄外靜看岩穴斗牛間
恐驚太史占星象一醉乘風跨鶴還

東池泛舟

馮裕

東城城下有蓮池小艇移來即漢陂
野老看人隨岸轉奚童送酒度沙遲
風恬帆外來山色日暮橋邊雪藕絲
欲約仙人蓬島去海天寥廓碧雲垂

遊石子澗訪西澗不遇

劉澄甫

西澗原頭訪隱君柴門寂寂閉秋雲
采芝徑遠迷幽壑看竹庭空待夕曛
流水新萍鷗井下野林芳草鹿成羣
踽涼獨步行歌徹悵望孤邨落葉分

秋夜觀天漢

陳經

清秋獨夜露沾衣耿耿銀河徹地輝斜度層城寒不濕
靜臨丹闕曉還微玉陂色借姮娥魄素錦文成織女機
自有乘槎問津者何須竟夜仰雲扉

霜葉

白雁南飛秋信來清霜昨夜到齊臺滿林紅葉水相映
一帶青山花又開石徑橫斜聊倚杖錦雲縹緲且銜杯
飄零處處榮華盡為認寒枝待落梅

鸚鵡

萬里何年西入秦
脩脩毛羽尚鮮新
祇緣慧巧偏憐汝
始信榮華鮮誤身
綵錠夢回朱戶夜
鄉園心繞玉闌春
何當解脫珣籠去
霄漢孤飛莫近人

椿桂堂

陳經

海上仙家雲樹長
滿庭椿桂鬱青蒼
靈根近接瀛洲境
金粟常流月窟香
蟠木叢叢應並壽
若華灼灼與同光
時人未識馮唐宅
却擬燕山竇十郎

山行田家歇馬

馮裕

雨霽山行石徑斜亂山盡處有田家輕雲冉冉浮孤嶂
流水悠悠過落花炊黍蒸藜催午餉蒼藤古木閱年華
青芻一束供羸馬歸路溪邊踏暖沙

觀耆英繪圖

黃卿

誰貌昇平壽域春百年絹素儼如新清流四海衣冠會
白首三朝社稷臣山水絃觴同笑詠松筠鸞鶴想丰神
詞林盛說蘭亭集蓬島瑤池此近真

前題

陳經

今昔耆英傳盛會丹青肖貌寫良工
龐眉皓首烟霞共
花下尊前杖屨同
身世太平思往事
衣冠晚節有遺風
于今林藪堪招隱
豈少青山似洛中

初夏登郡城樓望宿麥開花

雨霽風暄正麥秋
層城引望更登樓
含金遍野黃初見
舞浪排空翠欲流
萬頃膏腴迴斥鹵
兩岐歌誦滿甌簍
年豐道泰原相屬
暇日重銷賦客憂

幽居初夏雨霽

馮裕

四月邨居新雨晴短牆斜日明朱櫻千里遠嶂帶雲出
百道飛泉衝澗鳴苔徑看花蝶點點石橋攀柳鳥嚶嚶
遲回山月到原上濁酒呼來添巨觥

前題

陳經

夏木陰森蔭草堂山原霽色淨羣芳脩篁籜解千尋碧
紅葉翻階百和香錦席玉杯催短詠薰風長日送微涼
習池興味虛堪擬一醉真成河朔狂

晚坐

露坐庭空納晚涼
青山落日樹蒼蒼
東樓角起孤城近
北斗星回子夜長
心事百年惟捧檄
功名白首尚含香
居閒未是嗟遲暮
短景頻催暗自傷

前題

劉淵甫

山中無事度年華
獨坐踈簾竹影斜
偶向松梢看落日
又從山際數歸鴉
據床寂寂聽鄰笛
待月遲遲出水涯
但喜暫離塵俗事
欲除孤悶且烹茶

梨花酒

春酒梨花一色香對花呼酒坐茅堂連珠初壓槽頭滴
注玉纔浮盞內光擬放孤懷攀媚景轉看雙鬢著新霜
臘封菊釀能相並傲岸何妨醉後狂

堦除插蒂種瓜

石存禮

喜君未老得投簪瓜圃桑田遂賞心雨後杖藜隨鶴步
秋來傍菊聽蛩吟醉呼新釀床頭酒趣在無絃月下琴
我亦平生樂閒靜柴車何日許重尋

牧笛

馮裕

春草萋萋遍石谿牛羊飽後下來遲牧童獨對斜陽立
短笛時將隔隴吹曲盡山空雲縹緲聲迴天遠雁參差
林泉賸有逍遙叟一度聽來一解頤

半山亭

劉淵甫

名亭積翠通幽境峭壁陰崖掩夕暉夜語似疑山鬼聽
畫閒惟見海鷗飛門當澗壑流清響空落雲霞動草衣
松桂薜蘿招隱去逍遙塵外竟忘歸

前題

陳經

海畔孤亭倚翠微
丹崖蒼壁四重圍
蛟龍鬬雨時窺榻
虎豹從風夜守扉
半老樹懸巖戶出
無心雲繞石闌飛
空山闌寂誰來去
獨有幽人解息機

暑夜微涼集東渚第

黃卿

炎天詩社尚尋盟
鳴雨新堂太劇清
坐閱芳蘭扶檻色
起臨修竹滿簷聲
茗香冰盃觥籌靜
綺席風簾劍履輕
涼夕含毫催四韻
陽春相對愧難成

前題

劉淵甫

高會羣登燕翼堂尋常誰識靜中忙
若逢溽暑冠裳重
喜送薰風几席涼
老友自能追孺子
主人真謂到羲皇
劇談縱酒同河朔
移坐傳杯對夕陽

暑雨微涼會中諸友見過

陳經

積雨新涼起綠苔
一尊長畫草堂開
德星早卜賢人聚
窮巷歡迎長者來
濁酒慚無千日醉
好詩真有片雲催
羣公風雅仍多暇
薄暮淹留未擬迴

又

九夏愁拌舊酒杯一尊特為故人開
喧聲忽送長雷繞爽氣新從細雨來
下榻盡延徐孺客賦詩深愧孔璋才
更憐風雅論文飲莫謾流連避暑猜

乳燕

曉日晴暉畫堂舊巢燕子出雕梁
窺人似欲留新語矯翼那能戀故鄉
雲翥豈無鴻鵠志泥銜應帶碧芹香
主恩未盡開簾意去住遲回不忍忘

牛山秋望

石存禮

孤城宿雨晚來收
又向牛山瞰晚秋
澗樹縹紅初著色
巔雲凝黛尚含愁
青年早被浮名誤
白髮仍為卒歲謀
世祿無窮身有限
浮生擾擾幾時休

出山亭

劉澄甫

翦落桐枝見遠汀
愛山亭築出山亭
雲峯獨立當窻碧
劈岫雙瞻入座青
石榻宵閒烟漠漠
秋簾暮捲雨溟溟
草玄自擬揚雄宅
閉閣兼傳劉向經

前題

陳經

山畔孤亭對郭開
林疎秋靜碧崔嵬
憑軒翠壁雲舒卷
倚杖青天鶴往迴
咫尺西南連泰岱
逶迤東北是蓬萊
即看青鳥盤盤下
便有仙人玉鳥來

九日菊未開

石存禮

風雨重陽已近時
始移叢菊向東籬
莫言徵士歸來早
只怪黃花開較遲
獨賞不煩人送酒
急催猶賴我題詩
江空木落心知少
再結交盟更有期

前題

陳經

籬落亭亭菊未黃
秋清此日負重陽
歲寒冰雪甘真隱
晚節風塵恥艷妝
青女幾迴含玉露
花神何意惜瓊芳
臨風欲嗅馨香立
徙倚闌干索酒嘗

霜後鷄冠花

玉露零零百卉殘
芳叢馥馥透疎欄
絳英的皪擎霜重
綠葉翩翩報曉寒
不數汝陽朱槿帽
堪同門下鷄鵲冠
也知五德標名久
得近黃花晚節看

雪中望劈峯

楊應奎

劈嶺高寒插劍鉞晚晴遙望失蒼蒼千層華蓋從天下
九疊屏風帶雪張影落平蕪青黛掩秀分南極白雲長
他年五老能招隱便結松巢跨石梁

鶴骨笛

陳經

胎禽羽化幾千年蛻骨猶堪律呂傳幽夢似悲長脰斷
瘦形仍比綠筠堅香縹玄圃梅花冷春入青田楊柳偏
莫是曲中向人語五雲誰識令威仙

古塔鶴巢

馮裕

雙鶴春來巢古塔遠看疑是在青霄
風烟繚繞時冥晦戶牖綢繆不動
搖哺子也應同鵠鵠繫苔原自笑
鷦鷯欲將此義獻天子氛祲千年
暗裏消

寄澶淵李後菴

劉澄甫

十年征戍落江湘百粵心旌轉故鄉
漢帝有時徵賈誼梁園此日釋鄒陽
澶淵鷗鳥盟猶在海岱棠陰念不忘
忽見賓鴻問消息幾番書札待南荒

家釀美甚牡丹新開醉中自贈

東風寒峭掩山堂睡起南窓野興長
村甕試芻稭酒聖家園初發重花王
獨持翠竿愁應破更折芳枝喜欲狂
日暮自歌還自醉不知夢鹿與亡羊

海岱會集卷十

欽定四庫全書

海岱會集卷十一

五言絕句

襄陽樂

馮裕

朝往大堤去暮還襄陽城美人不肯別酌酒更彈箏

又

襄陽諸女兒隊隊踏歌行日落楚天碧月高江水平

又

家在峴山前門繫武陵船
桃花嬌可愛教妾若為顏

又

江水流無極郎歸來有期
潮回憑寄信為到海門西

前題

劉澄甫

妾在廣陵陌家臨明月橋
郎君解憐取赴著木蘭橈

又

曉行白雲渚夜泊黃鶴樓
秋風何處覓飛夢到瓜州

又

歡醉習家池
儂宿彭郎磯
東風吹酩酊
夜雨恐淒其

前題

黃卿

樊城卧紅橋
掩映七十二
下通畫舫舸
上馳華珂轡

又

東風與垂楊
低昂相憐取
南學西陵歌
北學邯鄲舞

又

陽春鄴綠酒
嬋娥自當壚
調笑東遊客
何如廣陵沽

又

盆中菖蒲花一夕免絲繞相贈紅襦襠莫似站林鳥

前題

楊應奎

井州快剪刀惜春不忍買儂有合歡帶綢繆豈能解

又

鬱鬱藤與蘿引蔓兩相齊秋霜搖落盡至死不相離

又

儂心漢江水歡意如孤舟舟行有去住水常日夜流

西洲曲

馮裕

楊柳覆西洲芙蓉映翠樓
春情獨自覺江水日悠悠

又

羅裙蓮葉綠丹靨蓮花紅
相逢獨不見含笑水聲中

又

估客何處來倚棹花門前
折花愁問訊心如不繫船

前題

劉澄甫

采蓮南渡頭采菱西洲口
日落不逢人秋雲重回首

又

鴻飛似無跡燕來如有期
鈎簾坐春曉幽夢竟誰知

又

早向西洲行暮向西洲宿
西洲人獨愁翠袖扳幽竹

前題

黃卿

弭棹傍西洲採菱狀波曲
菡萏並蒂開中有雙鴛浴

又

西洲檉柳岸蜻蝶集復散
忽落碧玉釵回頭問同伴

又

憐伴嬌喜笑愛唱長干調冷冷金步搖薦芳聖女廟

又

容顏如春芳愁思如零霜避霜玩朗月千里共清光

又

廟前雙梧桐蕤那搖東風桐下結衣帶蟠子拂人額

又

月光射帷帳流螢迥相向焚香步空庭三星在頭上

又

往訴薄倖人別來秋復春西洲雖見月不照翠眉顰

前題

楊應奎

水邊桃花發水映桃花紅棹舟約萍開萍散桃花空

上元觀燈

劉澄甫

今年好燈社是處結樓臺舞袖翻新柳歌喉轉落梅

又

山從鼇背立人向月中遊雪盡九華殿春歸五鳳樓

海岱會集卷十一

欽定四庫全書

海岱會集卷十二

七言絕句

早梅

黃卿

香飄瓊萼一時新
斜月溶溶雪夜春
若向花中較風節
祇應箕顙伴高人

柳枝詞

罩水如烟萬葉重
倚風飛絮曉茸茸
莫教吹落長河去

化作浮萍無定踪

又

畫簾風動影絲絲
曳綠搖金晝景遲
睡起倚闌看蛺蝶
鶯聲只在最高枝

前題

馮裕

溪柳青青拂碧空
小舟一棹曙烟空
楊花陣陣西飛去
黃鳥聲聲似夢中

又

柳溪陰裡亂鳴蜩載酒相過坐石橋日暮青山歸鳥盡
主人倚柱漫吹簫

又

陌上楊柳碧參差江上蘭橈倚幕時長歌解纜不知處
月冷烟空愁夢思

又

楊花冉冉遂征鞍旌旆悠悠去不還一夜香魂化飛絮
隨風萬里到長安

又

嫩葉柔條媚早春
朱顏青鬢更相親
年年條葉從攀折
飛絮飄飄不近人

前題

黃卿

園榭依依烟靄垂
習腰纔熟較新眉
多情枝上金衣鳥
啼到朱簾欲夕時

又

欲比新楊笑臉開
聞歌折柳罷金杯
芰荷堤上常如簇

移向長亭亭下栽

前題

劉淵甫

御水河堤見柳條退黃添綠媚仍嬌
自言態度渾相似不信君王惱細腰

牧牛

石存禮

牧牛何心相牛經只愛年年草色青
向晚不知春雨濕東風吹笠過西垌

醉樵歌

寒山影裡唱歌頻短服長鑱自析薪市入蘭陵惟換酒
醉歸翻笑獨醒人

冬筍

陳經

犢角嶄嶄入饌珍嚴冬頗訝發生新龍孫地底通幽蟄
隔歲先偷碧海春

秋懷

石存禮

鼓角城頭起一更鬱蒸消盡覺涼生飛螢入竹秋光淡
老鶴巢松夜氣清

又

瓦爐栢子細烟消
閑讀禪經破寂寥
風細月高人已靜
隔窓踈竹夜蕭蕭

又

溪上芙蓉映醉顏
悲秋宋玉鬢成斑
無情最是東流水
暗逐年光去不還

前題

馮裕

海上梧桐一葉飄
瀛洲風色共瀟瀟
仙人何處吹笙去

老鶴踰躑白玉橋

又

風捲烟雲幾萬重東溟漠漠靜魚龍曉來獨跨華亭鶴
飛過蓬萊第幾峯

又

秋風溪上芙蓉花溪邊女兒來浣紗顏色相輝都不語
暮雲渺渺隔天涯

前題

劉澄甫

露下風高旅雁回
霜空木落菊花開
長門自閉傷秋月
那得黃金買賦來

又

蘭堦玉露百花殘
桂殿金風一夜寒
珍重齊紈秋再熱
主恩爭得等閒看

又

長信空堦螢火流
昭陽碧殿月華浮
寒鴉聲斷君王寵
獨抱雲和恩不休

又

秋光淡蕩暗雲平
露滴宮槐風滿庭
青鳥不來仙駕杳
紫臺長望酒初醒

又

遠塞踈蕪逢暮秋
深閨寂寂對窮愁
黃花開處堪回首
白雁來時獨倚樓

又

梧桐朝隕玉欄前
絡緯宵啼金井邊
孤燈耿耿爐欲滅

新月娟娟人未眠

前題

陳經

金井梧桐高入雲
數聲秋葉墮紛紛
獨憐長信宮中道
簾外黃昏不忍聞

又

深院空堦秋氣清
驚心物候眼邊明
輕烟漠漠鳥雙去
零露瀟瀟鶴一鳴

又

雲卧巢栖滄海隈扶桑朝日望蓬萊樓臺蜃氣烟霄外
雙闕疑瞻五鳳迴

又

海燕窺人巧自謀棲身高入五雲樓爭知社日辭巢去
故壘蕭蕭風雨秋

前題

黃卿

幽賞獨消夜景清紫薇零露鵲枝輕分明桂魄懸虛碧
似雨兼風樹樹聲

前題

劉淵甫

秋到旋添黃葉徑風吹偏冷白雲居半生貧病甘踈拙
不怪朋遊不寄書

苦雨

石存禮

夜窓風雨送高秋一枕簷聲萬壑流可是銅壺添海水
麗樵不報五更籌

又

自是悲秋怕見秋喜看大火未西流如何幾陣芭蕉雨

又作南窓一夜愁

又

新秋一雨苦傷神
徹夜空階滴到晨
機杼有聲連蟋蟀
畫圖無夢上麒麟

又

隨身長物書千卷
閱世高風釣一緡
報說西疇差可喜
青黃野色望中勻


前題

馮裕

山村十日霏霏雨高下田原綠水平一帶農家多寂寞
炊烟時見起孤城

又

風雨瀟瀟一月餘前疇稷稻半為魚可憐海上騷人苦
不得斜陽照濕書



海岱會集卷十二